



Pranuar / Dorezuar Pritmjen/Prodato Received/Delivery	08.11.2023	3	viti god year
Organ /Njesia Organ./Jedinica Org./Unit	Nr Prot Br Prot Prot No	Shtojca Prilog Appendix	Sasia Kolicitna Quantity
SKDMBICK	6945/2023		1/4



Republika e Kosovës Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVA

A.nr.1160/2023

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari-kryetare, Arben Mehmeti dhe Ardita Haxhnikaj-Demi -anëtarë, me Kaltrina Avdullahi-Prenaj -Zyrtare e Lartë për Bashkëpunim Profesional, në cilësinë e procesmbajtëses, kanë shqyrtuar ankesën me numër A.nr.1160/2023 të datës 15.09.2023 të parashtruar nga ankuesi

kundër organit të punësimit Komuna e Kamenicës, në çështjen juridike "Kërkesë nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 08.11.2023, mori këtë:

V E N D I M

- I. Aprovohet si e bazuar ankesa me numër A.nr.1160/2023 e datës 15.09.2023, e parashtruar nga ankuesi
- II. Obligohet Drejtori i Përgjithshëm i Thesarit të Kosovës për zbatimin e këtij vendimi, brenda afatit prej pesëmbëdhjetë (15) ditësh nga dita e pranimit të njëjtë, duke i njohur ankuesit të drejtën e shtesës tranzitore me listën e pagave të muajit qershor 2023 e tutje, si dhe kompensimin retroaktiv të shumës në emër të shtesës tranzitore për periudhën korrik-gusht 2023.
- III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarjes së veprimeve në pajtim me këtë Vendim.

A r s y e t i m

Ankuesi i punësuar sipas Akt Emërimit me numër Nr.446/82 të datës 20.07.2011 në pozitën e punës „IT” në Departamentin e Administratës të Përgjithshme. Më datë 27.07.2023 ka parashtruar kërkesë me numër Nr.02/25337 në Njësinë për Burime Njerëzore në Komunën e Kamenicës, për shkak të vazhimit të shtesës tranzitore.

Ankuesi i pakënaqur me mos kthimin e përgjigjes nga Njësia e Burimeve Njerëzore e Komunës së Kamenicës lidhur me kërkesën me numër Nr.02/25337 të datës 27.07.2023, më datë 15.09.2023 ka parashtruar ankesë me numër protokollit 6087/2023 në Këshillin e Pavarur Mbikëqyrës për Shërbimin Civil të Kosovës, kundër mos vazhimit të shtesës tranzitore nga organi i punësimit Komuna e Kamenicës, ashtu siç ka qenë para zbatimit të Ligjit të Pagave.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 15.09.2023 ka proceduar kërkesën për përgjigje në ankesë në organin e punësimit/Komunën e Kamenicës, ndërsa Këshilli me datë 03.10.2023 ka pranuar nga kjo e fundit përgjigjen në ankesë së bashku me shkresat e bashkëngjitura të lëndës.

Kryetari i Këshillit të Pavarur Mbikëqyrës për Shërbimin Civil të Kosovës me Vendimin me numër VK/2023 dhe numër të protokollit 6717/2023 të datës 27.10.2023 ka shtyrë afatin për vendosje të ankesës edhe për dhjetë (10) ditë pune.

Kolegji për Shqyrtimin dhe Vendosjen e Ankesave ka administruar këto prova: Ankesën me numër protokollit 6087/2023 të datës 15.09.2023 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Kërkesë për vazhdimin e shtesës tranzitore e datës 27.07.2023; Vendim me numër nr.12588 të datës 21.04.2022; Kërkesë për pushimin pa pagesë e datës 23.03.2022; Raporti mjekësor i datës 10.11.2021; Listë e pagave për muajin Qershor 2023; Akt Emërim me numër Nr.046/82 i datës 20.07.2023; Listë e pagave për muajin Prill 2022; Listë e pagave për muajin Maj 2022; Kërkesë për përgjigje në ankesë e datës 15.09.2023; Përgjigje në ankesë e datës 03.10.2023; Vendim me numër Nr.12588 i datës 21.04.2022; Vendimin me numër VK/2023 dhe numër të protokollit 6717/2023 të datës 27.10.2023; E-mail i datës 08.11.2023.

Kolegji i Këshillit duke u bazuar në vlerësimin e hollësishëm të çdo prove veç e veç dhe të gjitha provave të marra së bashku, si dhe bazuar në rezultatin tërësor të shqyrtimit administrativ, konstatoi së ankesa e ankuesit *është e bazuar, sepse:*

Kolegji për Shqyrtimin dhe Vendosjen e Ankesave, nga provat e administruara të lëndës konstatoi se ankuesi është i punësuar në Komunën e Kamenicës, sipas Akt Emërimit me numër Nr.446/82 të datës 20.07.2011 në pozitën e punës „IT” me koeficient gjashtë (6) sipas Ligjit të vjetër të pagave.

Ankuesi në ankesën e datës 15.09.2023 me numër të protokollit 6087/2023 në Këshillin e Pavarur Mbikëqyrës për Shërbimin Civil të Kosovës, kundër heshtjes administrative të Njesisë së Burimeve Njerëzore të organit të punësimit Komuna e Kamenicës, lidhur me mos kthimin e përgjigjes së kërkesës me numër Nr.02/25337 të parashtruar më datë 27.07.2023, me pretendimin ankimor për vazhdimin e shtesës tranzitore sipas Ligjit Nr.08/L-196 për Pagat në Sektorin Publik, duke kërkuar nga Këshilli i Pavarur Mbikëqyrës për Shërbimin Civil të Kosovës, ta obligoj Zyrën e Personelit dhe Drejtorinë e Buxhetit dhe Financave që të bëjë llogaritjen dhe ndryshimin e pagës aktuale dhe pagë së re bazë nga data 01.06.2023.

Bazuar në shkresat e lëndës, Udhëheqësi i Njesisë së Burimeve Njerëzore në Komunën e Kamenicës, më datë 11.07.2023 dhe më datë 10.08.2023 ka dërguar kërkesën për ekzekutimin e shtesës në Thesarin e Kosovës për muajin Korrik dhe Gusht. Mirëpo nga këta të fundit nuk ka marrë ndonjë përgjigje.



Kolegji për Shqyrtimin dhe Vendosjen e Ankesave, lidhur me pretendimet ankimore të ankuesit analizoi bazën ligjore mbi të cilën janë ngritur pretendimet ankimore të ankueses, gjegjësisht nenin 41 të Ligjit Nr.08/L-196 për Pagat në Sektorin Publik më të cilin përcaktohet se: "1. Nëse një zyrtar/e publik/e apo funksionar/e publik/e, para hyrjes në fuqi të këtij ligji përfitonte pagë që është më e madhe se paga e plotë e parashikuar me këtë ligj, ajo/ai do të përfitojë pagën e re sipas dispozitave të këtij ligji dhe shtesën tranzitore të barabartë me diferencën ndërmjet pagës aktuale dhe pagës së re bazë. 2. Të punësuarat/it, zyrtarja/i publik/e apo funksionarja/i publik/e, në pajtim me paragrafin 1. këtij neni, do të përfitojë pagën e re në: 2.1. 100% të shtesës tranzitore të posaçme, sipas paragrafit 1, gjatë vitit të parë pas hyrjes në fuqi të këtij ligji; 2.2. 50 % të shtesës tranzitore të posaçme, sipas paragrafit 1, gjatë vitit të dytë pas hyrjes në fuqi të këtij ligji. 3. Përgjashtimisht nga paragrafi 1. dhe 2. i këtij neni, anëtarët/ët e shërbimit të jashtëm nuk gëzojnë të drejtën e shtesës tranzitore. 4. Çdo person që punësohet pas miratimit të këtij ligji përfiton pagën sipas këtij ligji dhe nuk gëzon të drejtën e shtesës tranzitore. 4. Çdo person që punësohet pas miratimit të këtij ligji përfiton pagën sipas këtij ligji dhe nuk gëzon të drejtën e shtesës tranzitore".

Ndërlidhur me konstatimin si më sipër Kolegji i Këshillit i 'u referua nenit 1 të Ligjit Nr.08/L-196 për Pagat në Sektorin Publik me të cilin është përcaktuar se: Qëllimi i këtij ligji është që të krijojë një sistem të njëtrajtshëm të pagave në sektorin publik që përfshin parimet dhe rregullat për përcaktim të pagës në sektorin publik si dhe të krijojë një sistem të pagave dhe shpërblimeve, transparent dhe të menaxhueshëm ku elementi kryesor është paga bazë, nenit 2 të të njëjtit ligj i cili parasheh se: "Ky ligj zbatohet për të punësuarat/it në sektorin publik pagat e të cilave/ëve financohen nga dhe përmes buxhetit të shtetit, përjashtimisht Agjencisë Kosovare për Inteligjencë. 2. Rregullat dhe kushtet për përcaktimin e pagës të të punësuarave/ëve në sektorin publik janë ekskluzivisht rregullim i këtij ligji dhe mund të rregullohen edhe me akte të tjera nënligjore, vetëm kur parashihet shprehimisht nga ky ligj. 3. Për nëpunëset/it në Presidencën e Republikës së Kosovës, Gjykatën Kushtetuese të Republikës së Kosovës, Sistemin e Drejtësisë, Kuvendin e Republikës së Kosovës, dhe institucionet e pavarura kushtetuese, ky ligj zbatohet për atë sa nuk cenon pavarësinë e tyre funksionale dhe organizative të garantuar me Kushtetutë..." si dhe nenit 45 paragrafi 2 " ... 2. Me hyrje në fuqi të këtij ligji shfuqizohet gjithashtu çdo dispozitë e ligjit apo e aktit nënligjor tjetër që rregullon çështjen e pagës, kompensimeve, shtesave, shpërblimeve apo kategorie tjetër në fushën e pagave, e që nuk është autorizuar shprehimisht për t'u nxjerr nga dispozitat e këtij ligj", nisur nga ky përcaktim ligjor Kolegji i Këshillit vlerëson se Ligji Nr.08/L-196 për Pagat në Sektorin Publik ka vendosur rregulla unike lidhur me pagat dhe kompensimet tjera, për të gjithë të punësuarit në sektorin publik (përgjashtimisht institucionit të Agjencisë Kosovare të Inteligjencës), duke u bazuar në parimet e ligjshmërisë, barazisë, mos diskriminimit si dhe transparencës, kështu që çdo realizim i pagave dhe kompensimeve jashtë rregullimit ligjor të Ligjit Nr.08/L-196 për Pagat në Sektorin Publik bie ndesh me dispozitat e të këtij ligji.

Rrjedhimisht, në kuptim të dispozitave ligjore si më lartë, secilit nëpunës i garantohet shtesa tranzitore, nëse para hyrjes në fuqi të Ligjit Nr.08/L-196 për Pagat në Sektorin Publik i njëjti ka realizuar pagë me të lartë se paga e përcaktuar me këtë ligj, në atë mënyrë që në vitin e parë pas hyrjes në fuqi të Ligjit Nr.08/L-196 për Pagat në Sektorin Publik, nëpunësi realizon shtesën tranzitore në vlerë prej 100%, në vitin e dytë më vlerë prej 50%, dhe nga viti i tretë nëpunësi civil përfiton pagë sipas këtij ligji.

Kolegji në mbështetje të nenit 18 paragrafit 1 nën paragrafit 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, Vendosi që ta aprovoj ankesën e ankuesit Jeton Basha duke obliguar Drejtorin e Përgjithshëm të Thesarit të Kosovës që në afatin e përcaktuar si në pikën II të dispozitivit të këtij vendimi, ankueses ti njeh të drejtën e shtesës tranzitore me listën

e pagave të muajit qershor 2023 e tutje, si dhe kompensimin retroaktiv në emër të shtesës tranzitore për periudhën korrik-gusht 2023.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër Vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1160/2023

Kaltrina Avdullahi-Prenaj


Zyrtare e Lartë për Bashkëpunim profesional

Malsore GASHI-BAJRAKTARI


Kryetare e Kolegjit



Vendimi i dërgohet:

- Ankuesit
- Drejtorit të Përgjithshëm të Thesarit të Kosovës,
- Udhëheqësit të Burimeve Njerëzore në Komunën e Kamenicës dhe
- Arkivoit të KPMSHCK-së

